

小
腆
紀
年

小腆紀年增攷卷第十五

前翰林院檢討加詹事府贊善銜六合徐鼎謨

戊子我

大清順治五年春正月

明永曆二年魯監國三年
海上朱成功稱隆武四年

丁酉朔明桂王在桂林

以朝臣星散免朝賀

明監國魯王在閩安鎮

元旦朝賀畢監國問閣臣熊汝霖曰先生有佳兆否對曰
臣夢道士羽衣蹁躚揖臣贈以詩末二句云可惜忠臣一
片心付與東流返故鄉監國默然尋改云堪羨忠臣百折
心喜遂澄清返故鄉汝霖頓首謝未幾而遇鄭彩之禍

明遣大理寺評事朱宿垣諭廣西左右兩江及雲南土司勤
王

宿垣所至諭以大義土司感激願效命復命遷江西道御
史

明論全州戰功晉何騰蛟定興侯太師上柱國兼兵部尚書
趙印選新甯伯胡一青興甯伯焦璉新興侯周金湯熊兆佐
馬春麟等予掛印有差

明四川總督樊一蘅巡按御史錢邦芑奏諸將收復功晉一
蘅太子太傅戶兵二部尚書擢邦芑右僉都御史巡撫四川
封楊展華陽伯王祥棊江伯諸將進爵有差

時一蘅再駐江上爲收復全蜀計疏列善後事宜及諸將

功狀邦芭亦奏四川全省恢定

攷曰紀畧謂邦芭疏報四川全省恢定九州一百三

十餘縣無論邦芭奏報虛誣且四川亦無百三十縣此由載筆者得之傳聞故種種荒謬故有是命其

實全省分崩離析號令各擅一蘄所保者敘州一府而已

袁韜據重慶于大海據雲陽李占春據涪州譚詣據巫山

譚文據萬縣譚宏據天子城侯天錫據永甯馬應試據蘆

衛王祥據遵義楊展據嘉定朱化龍據松潘曹勛據洪雅

又巫山之劉體純鄧城之胡明道金城之姚玉麟施州衛

之王光興皆甚著其姚黃諸家如王有進呼九思景果勒

張顯劉惟靈白蛟龍楊炳英李世傑等據夔州夾江兩岸

莫可稽考總所謂夔東十三家也而李自成之餘孽袁宗

第賀珍郝搖旗李本榮黨守素李永亨等自廣西南甯竄

入巴渠巫施間則所謂西山寇也顧皆承厯年號託名恢復又各州縣亂民號土暴子以打衙蠹爲名凡吏胥之有聲者糾衆擒之或投之水火甚則斃食其肉紳士家家奴悍僕戕滅其主深山大谷中豎寨柵標旗幟以人爲糧丙戌丁亥連歲游饑是年尤甚米一斗二十金蕎麥一斗七八金有持金珠而餓死者父子兄弟夫妻轉相賊殺城中雜樹皆成拱狗食人肉多鋸牙族居利刃不能攻多猛獸形如魍魎饕餮穿屋顛踰重樓而下傷人斃卽棄去亦不盡食也荒城遺民百十家日爲虎所暴有經數十日而一縣之人俱盡者鬼魅自晝出現與人爭道如是者十餘年而始平敘州人逃入深山草衣木食久與麋鹿無異見官

軍以爲獻賊復至也驚走上山步如飛追之及十年後猶有見之者其身皆有毛云

明封趙榮貴定隨侯

榮貴亦川中將時以保甯來歸

明以監軍僉事詹天顏爲右僉都御史巡撫川北

天顏永定人

宋光伯謹按縣有詹公祠詹大中丞坊亦載縣志

或曰龍巖人以貢

生起家爲松潘同知嘗與副將朱化龍擊斬獻賊僞將王運行復龍安茂州時川北報快定命天顏巡撫順慶潼縣

明以總兵皮勛守平溪

癸丑明魯鄭彩殺東閣大學士熊汝霖義興伯鄭遵謙

時國事皆決於彩汝霖每折之彩與定遠伯周瑞交惡汝

霖粟擬恆右瑞彩積恨既而鄭遵謙與彩等爭洋船汝霖
自閩安至琅崎休沐元夕熊鄭兩家相問遺守將李茂與
汝霖奴有隙遂以合謀告彩使其眾破門入執汝霖並其
子琦官甫六齡全家沈諸海中遵謙聞之心不平彩乃詐
撲部將吳輝令扶傷就遵謙求書投鴻遠遵謙過艤船送
之被擒輝既擒而慙伏艤底不出遵謙呼曰汝鄭彩廝養
殺我豈出汝意而相避乎輝出遵謙乞隻雞盂黍哭奠汝
霖畢蹈海死遵謙之妾金四姐者故倡也嘗以殺婢下獄
遵謙以千金出之慟夫之死束縶像彩每祭必寸斬以侑
食彩聞又沈之越十一年己亥秋彩坐廳事見汝霖遵謙
擁兵入爲仆七孔流血死

癸亥降將金聲桓以南昌叛我

天清復歸於明

聲桓舊隸左良玉軍夢庚之以所部三十六營降也諸將相率北去聲桓不欲從請規取江省以自効我英親王阿濟格令以提督撫勦總兵銜掛討逆將軍印聲桓遂自九江傳檄下南康南昌尋授鎮守江西總兵遣副將王體忠破建昌袁州萬安體忠闖將白旺之部將也自成死體忠刺旺以降兵既強又不肯薙髮聲桓結其左右王得仁誘體忠至都察院殺之其部衆大噪與聲桓兵戰於南昌城中民居盡燬得仁撫定之乃以得仁代爲副將得仁驍勇善戰軍中所呼爲王雜毛也以次定撫州饒州吉安廣信

江右悉平惟贛州未下聲桓自以不世功疏言臣原銜提督撫勦今更爲鎮守體統迥異請如原銜賜敕印節制文武便宜行事

皇帝以所請冒昧不許

命還其孥

敗其妻子兄弟被獲聲桓既請

王師戰旅順兵命還之

既克贛

州旦夕望封侯不得敘錄亦不列得仁銜二人氣索巡撫章于天遇之倨且勒賄無厭心益鞅鞅丁亥秋有公燕席地賓饕餮文吏皆上坐而聲桓得仁坐於外得仁有忿色于天頤之笑曰王把總欲反邪二人恥且恨得仁所居爲宜春王第嘗於後堂張樂自著明衣冠令優人演郭子儀諱世恩故事有計之於我巡按輩學成者學成揚言將奏

聞而陰遣人求重賂兼乞其侍兒得仁恐以侍兒予之居
家狀更泄撫按並力持之誅求累億得仁怒裂眦堅勸聲
桓速舉事幕中客某詭言隆武帝未死在五子寨命客往
探之客卽假以敕命封聲桓鎮江公得仁維新侯二人大
喜過望是年正月于天以搜括富室莊田率數十騎赴瑞
州得仁告聲桓曰此非爲括金其將贛撫會議不利於我
邪適聲桓妻子已自都還因集將士密議書約山東河南
刻口並舉得仁出建昌合揭重熙余應桂諸部或謂得仁
曰聲桓疑而詐脫有中變而公願居外也不若坐據百門
仗鉞投袂爲必不可過之勢以脅之彼必不敢不從但貴
神速耳於是得仁立傳令部勒全營杜七門圍守巡按官

廨時二十六日壬戌夜漏下已三十刻翌晨得仁擐甲縛
學成至聲桓所大聲言奉詔恢復聲桓唯唯未及答得仁
卽起而割其辮以令箭傳示諸營悉剪辮出諭安民稱隆
武四年凡軍民之戴纓帽者輒射殺之一時城中棄帽如
山卽日縊殺董學成及副使成大業禽章于天於江中迎
太保姜曰廣入省爲盟主傳檄遠近全省復歸於明惟贛
州不下初聲桓少時嘗師事維揚僧惠宗僧捐其臂曰勉
旃二十年後江右福主世人盡變紅頭蟲此其侯已後
師帽著紅纓聲桓得建牙江省益信禮之僧每勸其改圖聲
桓意遂決云

臣鼎曰紀年一書遵

純廟聖諭暨

欽定卹諡攷之義例自文武大吏以及草莽之臣惓惓不忘故國者表而出之而如金聲桓李成棟之流方其創戈故主旣無不徂存魯之心旣已授鉞

新朝又忘豫讓國士之報視君父如傳舍刈人命如草菅此輩之肉又足食邪直書爲叛而不復以反正之義相假借者所以誅亂賊之反覆而明臣子之大防也

明前大學士朱繼祚起兵會魯同安伯楊耿復興化

繼祚莆田人萬厯己未進士授庶吉士進編修天啓中與修三朝要典崇禎初官禮部右侍郎南都起故官未赴闕中召爲東閣大學士從至汀州隆武帝遇害奔還鄉里是

時監國在闔安鎮鄰境州縣多下繼祚亦舉兵應之與同
安伯楊耿合攻興化守城監司彭遇颺故南都御史也令
將士出戰已卽登陣易明旗幟守將見之不敢入遇颺遂
開城招繼祚入守之

二月鳳陽地震

我

大清兵攻平溪明總兵吳尙慮等死之

孔有德之前鋒統領線國安遣降將田起鳳攻平溪尙慮

率副將三人

攷曰三人失其名

逆戰皆敗死

我

大清兵克永甯寨明貴溪王常淝

攷曰貴溪王榮莊王庶六子自裁頃後無攷常淝其孫屬

也總兵項登韋攷曰東華錄貳臣傳皆作向登位者蓋皆死

之

明崇陽王

攷曰世表無崇陽王此其南渡後所封攻黎平敗績

崇陽王率苗兵十二營攻黎平爲降將陳友龍所敗諸營俱潰獨興化土司迎奉國將軍暉奎入寨以兵千人守之寨破暉奎死之

丁亥明郝永忠大掠桂林桂王山奔

永忠與

王師戰於靈川敗績奔還桂林左右近臣勸王幸南甯瞿式耜曰督師警報未至營夜驚無大恐二百里外風塵遽使九五露處邪播遷無甯日國勢愈弱兵氣愈不振民心皇皇

復何依近臣倉皇色變式耜曰無已候督師歸果急天威
咫尺激厲將士背城借一勝敗未知若以走爲上策桂危
柳不危乎今日至桂明日不可至南太乎反復千言王曰
卿不過欲朕死社稷耳嚴起恆請俟明晨再議五鼓式耜
進御用銀三百兩而乘輿已發矣先是焦璉遣人謂式耜
曰強敵外逼姦宄內訌勢不能兩全願移師至桂保公出
城俟賊乏食統兵四面擊之賊兵可盡然後以全爲保障
以梧爲門戶協力守之事可萬全式耜以治兵相攻爲不
祥且虞敵騎擣虛不聽至是時趨出送駕永忠以兵遮之
不得行掠署中冠服圖書咸盡式耜裸而坐家人以何督
師金寶遺之登舟永忠乃縱火大掠捶殺太常卿黃太元

日中滇營兵亦自靈川撤入城煙火高於樓櫓式相舟泊

城外三里之樟木港刑部侍郎劉遠生

攷曰遠生卽廣府

敗被執逃歸劉承胤

以同姓起用

爲江西巡撫時兵

劉湘客皆至謂兵變倉卒請下平朔催焦璉兵入援檄遠

近無內恐檄紳士毋驚疑薙髮檄一吏入城息烟火收倉

儲毋爲亂人所盜舟至豆豉井人民舍草檄明日以小艇

入城廡舍零落屍臭烟薰乃暫駐陽朔而檄檢討蔡之後

評事朱盛濂僉事邵之驊先入城賑貧民殮太元屍掃街

衢以定人心

辛巳鎮江地震

癸未金聲桓攻贛州

初聲桓與王得仁頗相得歸明後各自爲功金之族人皆得爲都督幕客黃人龍爲總制得仁之妻弟黃天雷爲兵部侍郎各開幕府門趨如市是月朔得仁率衆取九江客胡澹進言宜乘破竹勢直趨建業下流猝無備必易舉建業舉而兗豫響應更引兵而北中原可傳檄定也得仁以澹謀告衆皆主之人龍不可曰贛州居上游文武重臣俱在宜先取之不然且擬我後妾曰廣亦言甯庶人起兵不破贛卒貽後患我湖廣提督羅錦繡恐聲桓兵趣楚欲先敵之於贛州觀勝負爲向背貽之書曰人心未死誰無漢思公創舉非常天下咸引領企足日夜望公至但贛州東西要害山川上游公欲通粵則贛界其中公欲他出則贛

乘其後莫若先下贛贛下則楚地可傳檄定矣聲桓然之
率兵圍贛以宋奎光守南昌

徐鼎曰不曰明金聲桓何不與其爲明臣也

乙酉我

大清兵取全州明中書舍人周震守備孟泰死之

初武岡之失也中書舍人周震居全州集文武將吏盟於
神誓以死拒條上城守事宜卽擢御史充監軍

王師旣逼諸將議舉城降震力爭不可衆怒殺之泰本州人仰
藥死妻子皆自殺我定南王孔有德遂取全州

明詔阿騰蛟入守桂林我

大清兵遂克興安之巖關

時騰蛟自守巖關及奉詔守桂林

王師遂克興安破巖關軍士死者萬人興安總兵三人

攷曰三人失其名

及副參游以下四百人皆死之

辛卯白虹貫日

明監國魯王以錢肅樂爲東閣大學士

肅樂四疏力辭不許乃與馬思理林正亨同入直時鄭彩連害熊鄭逆節大著肅樂每日繫解於王舟之次票擬章奏封進後則牽船別去彩之使人守福安也劉中藻與之爭彩掠其地肅樂與中藻書不直彩彩刺得之恨甚以爲樹外援圖已朝見之次輒故誦書中語肅樂自負血淚至是憂憤交至每入見流涕不止曰朝衣拭淚昔人所譏臣

今亦不能禁監國爲之潛然

三月丙申朔明瞿式耜何騰蛟入桂林

焦璉自平樂至楚鎮周金湯熊兆佐滇鎮胡一青先後統兵至軍勢復振

乙巳明桂王如南甯命大學士嚴起恆王化澄入閣起恆兼吏部尙書以龐天壽掌司禮監加南甯守道趙臺巡撫銜

隨駕者止嚴起恆馬吉翔兵部尙書蕭琦科臣許兆進吳其鑑尹三聘洪玉鼎洪士彭數人而已

攷曰本粵事記蕭琦江西人崇禎丁

丑進士趙臺北京人

戊申我

天清兵攻順慶

安南國入貢於明

庚戌明開選南甯

時君臣資斧乏絕嚴起恆懸示通衢廣爲開選二十四土
州檳榔鹽布諸賈及土樂戶皆註仕籍假府學明倫堂爲
公座蒞任地旗幟軒蓋偃僂磬折日以百數贊禮生爲之
驕貴

丁巳我

大清兵攻桂林明督師何騰蛟率諸軍禦卻之

自郝永忠亂後

王師疑桂林空虛直抵北門騰蛟督將校分三面出胡一青以
滇兵出文昌門周金湯熊兆佐以楚兵出榕樹門騰蛟自

與焦璉出北門戰未合璉奮臂顧左右曰璉爲諸君破敵
橫矛直奔我營我兵圍之矢如雨下璉左右衝擊勢如游
龍我兵合而復散者再撫粵將軍劉起蛟亦大呼殺人與
璉合擊殺數百人貫其營而出胡一青從東至騰蛟撫其
臂曰兒好爲之一青應聲躍馬馳擊一青短小便捷馬上
騰蹕如飛能標槍取人數十步外百發百中每乘馬必翦
其鬃

王師認爲牛輒相戒曰此騎牛蠻子不易當也一青與璉合兵
再戰金湯兆佐橫擊之璉標下趙興白貴殊死戰

王師大奔追二十里大帥幾獲乃北渡甘棠去時三月二十二
日丁巳也瞿式耜卹死事家爲壇祭之焚白貴屍得箭鏃

數升騰蛟乃列營榕江

戊午明延長王識鐸

攷曰明史世表太祖慮子孫命名重複於東宮親王世系各擬二十字每一字

爲一世肅府有瞻祿貢眞弼緒紳識烈忠云云延長王紳封於萬厯年襲按世系字識鐸當是紳封之子襲封年月日則不可攷耳南渡起兵蘭州不克死之後諸王類如此

獨人米喇印丁國棟據蘭州擁立識鐸我總督孟喬芳提

督張勇會師擊敗之是年五月識鐸被擒於馬家坪死之

喬芳勇皆降臣也

明晉荆江伯張先璧爲侯

明瞿式耜檄諸鎮復全州

明瞿式耜檄廣西巡撫魯可藻復梧州

王自江自之變北旋式耜檄諸路進取舊例東撫稱制兼粵

西西撫稱撫可藻自署銜兩廣瞿式耜曰方今武人多自署撫軍徒貽遠人笑疏正之

明周鼎瀚免

當武岡之亂言官彈鼎瀚以附劉承胤入直式耜司票擬曰王沂公云進賢退不肖皆有體瀚係大臣應聽白謝免已而鼎瀚擅假式耜曰不謝免而擅假毋乃不可乎疏論之

明賜瞿式耜銀幣金圖書

桂林兵火之後監司府縣俱散式耜撫循收拾治簿書誠職守措兵餉疏達行在候天子三宮起居王聞式耜在大喜璽書旌美賜紗段銀兩式耜念南甯蠻鄉不可久蹕爲

王清輦道朝政有關必馳疏論諫嘗曰臣與皇上患難相
隨休戚與共原不同於諸官一切大政自當與聞朝議可
否衆指所歸本亂而求末治未之有也王褒納之

我

大清兵攻潼州綿州

明以禮部侍郎朱天麟爲禮部尙書尋進東閣大學士

天麟字游初崑山人崇禎戊辰進士授饒州推官攝屬邑
有聲考選授部曹講官爲之稱屈比臨軒親試改翰林院
編修奉命祭淮抵山東而京師陷閩中擢詹事署國子監
事見鄭芝龍跋扈乞假至廣東聞汀州變走廣西入安平
土司王之任武岡也以禮部右侍郎召辭不赴具疏請王

白將爲先鋒倡率諸鎮毋坐失事機是時擢禮部尙書拜
東閣大學士又白請親率土兵畧江右不聽乃趨朝入直
明陳邦傳自請世守廣西瞿式耜疏止之

邦傳之子禹玉自恃迎駕功欲得南甯添設巡撫趙臺素
得士司心不之讓治兵相攻邦傳在潯州自請世守廣西
如黔國公故事式耜駁之曰海宇剝削止粵西一隅爲聖
蹕之地楚滇數萬之師取食一省輒曰獨擁耄老臣所何
哉

明進呂大器爲少傳督西南諸軍賜尙方劍便宜行事

王應熊卒於畢節衛以大器代督師按部至涪州蕩寇將
軍李占春來謁以爲可用深相結因欲遍觀諸將能否人

遵義王祥具橐韃迎甚恭大器知其無能爲太息謂李乾德曰楊展志大而疎袁武忍而好殺祥尤庸懦不足仗蜀事尙可爲乎一日於石柱司夜遁走黔之獨山州鬱鬱疽發背卒

明前兵部尙書周損安慶知府傅夢鼎潛山典史傅謙之等

奉石城王統錡起兵六安敗績皆死之

攷曰統錡當石城王之第七世孫石城

王宸浮於嘉靖二十七年無子除統錡蓋其文庶也諸書云石城王統錡者國雖除而民間猶以祖宗之爵稱之

廬州有馮宏圖者謔言史閣部未死假其名召衆遠近信

之是年春攻英山霍山六安州皆下之大江南北欣然謂

閣部尙存也未幾敗沒無爲州吳光亡巢縣葉士章皆以內應受誅於時英霍間義旗雜樹有寨主洞主之號其四

十八所周損麻城人崇禎癸未進士授饒州推官行取御史

王師入江西損走福建隆武帝授兵部尙書歸家與猶子羽儀練鄉勇知宗室石城王之孫統錡立飛旗寨乃率卒數百人馬數十匹歸之夢鼎貴州人以選貢官泗州教諭獻禦寇策擢鳳陽同知遷安慶知府城破走潛山踞皖澗寒謙之故潛山典史又有桂蠟者鄱陽諸生義堂和尙者故公安貢生偕歸統錡事敗皆死之

明魯職方主事王翊復起兵四明山

翊字完勳號篤菴少孤不善治生業弟翊以耕讀助之補諸生好談兵見時方多難思自効畫江之役王正中薦之

監國授職方主事以軍事屬之江上破黃宗義引殘卒入四明山結寨山民攻之時翊方走海隅

王師購之急囚其弟翊以招之翊與幕下諸生皆不屈死翊泣曰是真不負完勲家也既與屠獻宸華夏等謀襲甯波不克乃以所募衆入山是年春破上虞殺攝印官浙東震動王師由清賢嶺入敗翊衆於丁山屠四百人有孫說者中流矢死屍不仆御史馮京第白湖中軍破亦間行至四明與翊合軍杜畧山民之團練者導

王師攻破之別部邵不倫亦見獲京第匿民舍翊以四百人走依咸遠將軍天台洞主俞國望謂諸將曰是皆團練之罪也北兵雖健吾視其銳則避之懈則擊之非團練爲鄉導

彼安敢行險地如枕席乎吾卒雖殘破團練尙有餘力遂
自天台至四明擊散團練者隨道收合得萬餘人而京第
亦出明年己丑春再破上虞走其知縣告山中父老曰前
此諸將橫擾激變今我軍足爲是山衛而一無所擾倘念
故國其許我乎遂結寨於山之西北境曰大蘭山號大蘭
洞主當是時浙東千里之間山寨鱗次蕭山石仲芳會稽
王化龍台州俞國望金湯吳奎明奉化袁應彪浙西之湖
州柏襄甫等亦應之其餘小寨支軍不下百數然皆招集
無賴不能不從事鈔掠惟張煌言軍平岡李長祥軍東山
故都督章欽臣軍會稽之南鎮則皆且畊且屯不擾於民
而又單弱不如翊雄翊於山中設五營五司五營主軍翊

統之五司主餉慈谿諸生王江主之江字長升善會計量
富以勸履畝而稅兵無盜糧翊信賞罰衆大悅服四明之
有訟獄者不之官而之大蘭四明二百八十峯之租賦亦
不之官而之大蘭胥吏無敢下鄉汎兵則遠伏眺望列城
畏之若老羆當道城門書閉如是者數年

我

大清兵克興化明東閣大學士朱繼祚參政湯芬給事中林岵
知縣邵廷諫皆死之

朱字方侯嘉善人崇禎癸未進士嘗爲史閣部監紀推官
閩中授御史監國以爲參政分守興泉城破緋袍坐堂上
被殺

廷諫杭州人知莆田縣城破皆自殺

我

天清兵克建甯明鄭西王常潮守將王祁皆死之

祁巷戰不勝自焚死

我

天清兵取福建明永福在籍給事中鄔正畿御史林逢經長樂在籍御史王恩皆死之

正畿字鴻原逢經字守一俱投水死恩服毒死妻李氏殉之自監國入閩先後克獲建甯邵武興化三府福甯一州漳浦海澄連江長樂等二十七縣軍聲頗振至是我

大清調兩廣江浙之兵三路進討所得復盡失僅存甯德福安

兩邑而已

夏四月

明閏三月

丙寅朔明元子慈烜生冊爲太子大赦

攷

行朝錄載爲四月乙未朔日事蓋宗義得之傳聞又以閏月而誤也茲從行在陽秋

臣肅曰是年我

天清閏四月而劉湘客行在陽秋黃宗義行朝錄木拂甲行日

注俱載明厯閏三月

天命有歸龍閏何數然紀明事而棄明厯非史法也故以分注紀之

明畧式耜進入箴

式耜以經筵不御無由聞得失手書八箴於筵進之

乙亥降臣李成棟以廣東叛

大清復歸於明

成棟初爲史可法部將守徐州

王師南征率所部降貝勒博洛征浙江成棟分徇太倉嘉定南匯上海授鎮守吳淞總兵官下崇明荊本徹竄入海從征福建定邵武汀州漳州順治三年十月貝勒承

制以總兵佟養甲爲兩廣總督成棟署兩廣提督合軍征廣東所向克捷成棟收繳文武印信五十餘顆而取總督印藏之旣敘功養甲授總督兩廣假便宜而成棟僅授提督銜疑養甲抑之怨望形諸詞色愛妾張氏陳子壯之妾也成棟豔而納之年餘不歡偶演劇張氏見之而笑成棟詰之氏曰爲見臺上威儀觸目相感成棟遽起著明冠服氏取

鏡照之成棟歡躍氏察知之因慙慙焉成棟撫几曰憐此
雲間眷屬也時成棟眷屬猶在松江故言及之氏曰我敢
獨享富貴乎請先死以成君子之志遂自刎死成棟大哭
曰女子乎是矣拜而殮之嘗遣部下載寶入京將行賄過
江西地已歸明扼之不得通子壯雖殉難其子中書僉生
猶擁舊卒爲復仇計成棟益懼一日與署藩司袁彭年養
子李元盾登樓去梯相謂曰吾輩因國難歸

清然每念之自少康至今三千餘年矣正統之朝雖敗必有中
興者本朝深仁厚澤遠過唐宋先帝之變遐荒共憫焉今
金將軍聲桓所向無前焦將軍璉以二矢復粵七郡陳邦
傳雖有降書而不解甲天時人事殆可知也又聞新天子

在粵西龍表酷似神祖若引兵輔之事成則易以封侯事
敗亦不失爲忠義議遂決池州有胡奇者故從養甲辦事
授南雄知府褫職閒住密知之以告養甲養甲不之備會
贛州告急養甲撥藩庫餉入萬令成棟往援之彭年故遷
延不發以激怒軍心成棟又潛招花山羣盜縱火焚野呼
聲動天地給養甲曰贛州早暮亡而此間土寇深五嶺且
不保彼聲言復故國耳曷若權宜許之俟治軍再勦養甲
故知其不可而無如何勉出示許士民復冠裳成棟則密
製大旗遣人掣總督旗而以新旗易之宣言曰總督降矣
用所藏明總督印奉永厯朔遣投誠進士洪天摧潘曾緯
李綺齋奏赴南甯迎駕時陳禹玉趙臺相仇殺人心皇皇

月系公 卷一五
午聞成棟反正驚疑百端天擢等力陳成棟忠誠且述金聲桓反正事甚悉人心始安諸臣在粵者爭往迎駕成棟遮止之惟耿獻忠在梧州得先輸款焉

癸未明荆江侯張先璧復靖州遂復沅州

我沅州道戴國士卽前誑陳泰來者也以沅州叛歸於明先璧題授右僉都御史巡撫偏沅

明召前四川巡撫毛芝瑞爲吏部侍郎

劉承胤之在武岡也芝瑞嘗力折之幾被害走廣東病踰年知養利州黃嘉卿以書迎之移居萬年城時以吏部侍郎召拜命遂卒

明前吏部員外郎華允誠被執至江甯論降不屈死之

允誠字汝立號鳳超無錫人天啓壬戌進士崇禎元年起
營繕主事進員外郎調兵部職方員外郎是時溫體仁在
內閣閔洪學在吏部兩人相表裏謀翻逆案允誠上三大
可惜四大可憂疏奉旨再詰責允誠據實陳奏舉朝共危
之僅奪俸半年尋終養歸南都起驗封員外郎署文選司
事蒞官十三日見高宏圖徐石麒先後去位卽引疾退南
都亡屏居墓田時有訐其不難髮者逮至江甯滿漢各執
事並以緩言款之允誠直立南向舉手曰二祖列宗神靈
在天允誠髮不可薙身不可降賦絕命詩遂見殺年六十
一歿曰絕命詩有渡江一律云視死如歸不可招孤魂從
北赴先朝數莖白髮應難沒一片丹心豈易清世俾有
靈依海岸天祥無計挽江潮山河從孫尙濂字靜觀亦以
漢漠長留恨惟有羣鷗伴寂寥

不雉髮同日死僕薛成閫主被執長慟不食先一日死訃至僕宋孝號哭觸階死

徐嘉曰聞之汪有典云公從高中憲得主靜之學觀其從容就義不負師門斯乃爲君子儒哉公臨難時謂尚廉曰心卽太虛之心太虛中何會有刀鋸斧鉞清其刀鋸斧鉞不得加焉之心亦安往不得哉蓋公之見道分明如此視夫計無復之引決自裁者異矣

閏四月

閏四月

乙未朔明遣吏部侍郎吳貞毓祥符侯侯性

勝李成棟軍封成棟惠國公佟養甲襄平伯杜永和江甯伯
程成發寶豐伯董方策宣平伯郝尙久新泰伯張月博興伯
閏可義武陟伯

明以晏清爲吏部尙書

時有沈原渭者再齋成棟速駕之奏至賜宴殿前加右副都御史於是羣臣伏處者爭出晏清至白田州張鳳翼以兵科兼修撰張佐辰掌文選司張扶綱掌考功司董雲驤爲行人潘駿觀爲職方郎中王渚爲戶部主事張起王者友朱士焜以原官考選又有考貢之旨邨師巫帝能提管書字者投呈就試章服錯亂或補鶴而帶銀或帶金而補雀官不如其帶品不如其服新創朝廷漫無等威論者咎嚴起恆焉

敦曰本粵事記原渭吳江人晏清黃岡進士佐駿觀湖州人清池州人皆生員起蘇州舉人者友南京人焜靖江人皆貢生

五月乙丑朔日有食之

甲申我

大清兵取明潼州

丙戌我

大清兵取明綿州

辛卯明督師何騰蛟復全州

降將陳友龍以武岡州叛我

大清復歸於明

我

大清兵圍南昌金聲桓王得仁皆引兵還

聲桓圍贛州我守將高進庫固守聲桓愛其才令軍士勿放礮增壘困之我固山額真譚泰何洛會帥師進討步騎

數十萬舟萬餘艘衝尾浮江而上金鼓震天議者謂

王師之盛前此未有也議救贛州有獻伐魏救韓之策者遂分兵復九江南康進逼南昌聲桓兄成勛及部將楚國佐得仁部將貢鼇等將內應宋奎光殺之奎光多機智能肆應**王**師急攻得勝門城壞奎光壘石囊土悉力禦之出神槍火箭焚燬攻具兵少卻報至贛**王**得仁先知之計曰我聞先發制人不制於人莫若秘其警報不令人知銳志攻城三日贛且下贛下則一軍守贛一軍守粵粵知贛破必從風而靡然後西通西粵右守嶺表

清兵知贛破必解圍向贛我以逸待勞南昌亦得息肩間出以絕糧道則數十萬之衆可殲於旦暮矣若攻城垂破而棄

之強敵在前賴乘其後此危道也聲桓以家在南昌遽退
師得仁部衆見之亦走斬之不能止城中兵突出自相踐
踏者數千人聲桓既突圍入南昌得仁乃以兵二萬趨九
江姜曰廣檄召之得仁曰九江據長江要津轉輸必由之
道敵以十數萬之衆深入攻城而糧道已絕非分兵攻我
卽撤兵東下分則勢弱撤則師勞九江四面臨江城小而
固以我守之未可猝下公輩引兵徐出東西撓擊內外夾
攻此騎角之勢若棄要害入孤城猛虎陷阱徒成擒耳
曰廣不聽一日夜檄數十至得仁歎曰不遇欲得仁同公
輩北也遂撤兵西上

下卽以功爲巨礮扼諸路得仁身先士卒轉鬪而前斬級數千

旋中伏大敗於七里街嗒然若喪盡撤城外屯兵入壁聲
桓部將郭天才爭之不得自割黃泥洲爲犄角天才所統
皆川卒精銳無敵三戰三捷我軍頗憚之宋奎光單騎渡
江按行地利請移兵二隊一駐生米渡一駐市汊以達餉
路聲桓得仁主堅壁議並不聽有一道士自言能運樂役
鬼茹素戒殺自有天兵來助城中信之百日不出兵初
王師屢勝而軍中每夜驚土襍毛來久之見城中無關志迺掘
長濠以固之東自王家渡屬灌城西自雞籠山屬生米渡
起土城駕飛橋自是內外耗絕聲桓得仁惟嘆惜悼恨而
已

庚朱成功復同安

成功統林習山甘輝攻同安守將祁光秋廉郎出戰輝擊
敗之斬其守備王庭郎與知縣張効齡棄城遁成功入城
安民以吏部主事業翼雲攝知縣事舉人陳鼎爲教諭留
邱縉林壯猷金作裕將兵守之翼雲字敬甫廈門人崇禎
庚辰進士鼎字尙圖同安人天啓丁卯舉人

六月甲午朔有流星人於箕尾

丙申明瞿式耜勞師全州

初騰蛟之復全州也報捷疏有云爲皇上以信臣用臣者
式耜一人也式耜勞師諸軍列營城外數十里旌旗蔽日
將帥咸帕手弓刀伏馬前曰微瞿公無以有今日
戊戌明魯東閣大學士兼吏兵二部尙書錢肅業卒

肅樂少時嘗夢日墮其手扶之稍稍上終不支漸小漸晦卒墮臂下旣聞連江失守血疾大動監國賜藥不肯進遣命以部郎服殮志不忘先朝也年四十三訃聞監國震悼輟朝三日親製文賜祭九壇贈太保諡忠介蔭其子兆恭尙寶丞弟御史肅圖簡討肅範挈兆恭依劉中藻福甯破肅範死肅圖以兆恭走舟山未幾兆恭亦卒遂無嗣弟肅典肅遴肅繡皆以國事死惟肅圖善終肅樂歿後六年故相葉向高之孫進晟海甯職方姚翼明始乞地於黃檗山僧隆琦而營葬焉

明封金聲桓豫國公王得仁建武侯

聲桓歸明半年尙稱隆武四年有舊臣至述國陷廣立之

詳始改稱永歷遣人問道齋佛經置密疏其中赴南甯輸款瞿式耜疏請慎選持節大臣往諭聖德彼數年不見天子苟號令緩急失宜不亦褻朝廷而失人心乎少司寇劉遠生固秦人久於節鉞名聞江右可遣也疏人不報聲桓降表自署豫國公詔改封昌國聲桓頗鞅鞅致書朝臣請還故封久之始如所請

甲辰明桂王發南甯封陳邦傳慶國公

王與三宮由邕江登舟出南甯抵潯州以宮眷有疾留數日守將陳邦傳以王爲奇貨也挽留駐蹕邦傳初疏薦趙臺臺旣得志見邦傳世守粵西之奏爲瞿式耜所駁朝臣亦多惡之臺乃絕其婚至形之章奏以博衆歡邦傳宣言

聖駕下廣臺必隨扈吾殺之臺間之遂留南甯邦傳而言
皇上聽兩衙門交構於臣無少加恩倘丁亥二月無臣父
子血戰梧潯三晝夜焉有今日趙臺賴婚負義皇上反加
優容彼且不敢隨扈何足任留守南太係臣轄下何必再
設巡撫望皇上大奮乾剛毋爲文武作奴僕身受寶禍王
面亦不能答但云爾補本來不得已許邦傳居守潯州設
官征賦如瞿式耜之在桂林邦傳必欲世守如黔國公之
在雲南大學士朱天麟執不許邦傳怒令胡執恭傳語曰
勲公將以劍印擲公舟令各營兵聽公發付天麟不爲動
中書舍人張立光受邦傳賄賂黃時竟以世字易居字勲
卿不及察給事中吳其雷疏參之督師何騰蛟巡撫魯可

藻御史吳德操先後論列勲鎮曹志建亦譁然不平事遂寢邦傳益肆侮朝臣繼家丁石碎兵部尙書蕭琦舟環而詈之琦憤悶死拳毆戶部主事王渚死既晉公爵乃以劄付授人官始用慶國公劄繼而部劄後用欽劄以爲兵需及沿途扈從賞資之費焉

明堵胤錫復湖南州縣

時李成棟歸明於是馬進忠王進才李赤心高必正等乘間復湖南郡縣進忠等皆封公

秋七月甲子朔明桂王次梧州謁興陵

攷曰桂端王陵也

時李成棟遣使迎駕陳邦傳請留蹕潯州瞿式耜慮成棟之欲王自專如劉永胤事也力請駕幸桂林疏曰興陵兩

載陷風塵成棟令地方官修葺陵殿巍然天壽彼數年想
見天子漢官一旦奮不顧身具移山超海之力更非有所
疑也但事權號令宜歸於一茲軍中爵賞署置若歸於朝
廷則事權中擾閭外不能專制不歸朝廷則徒虛拱且楚
黔雄師百萬騰蛟翹首威靈如望雲霓聖駕既東軍中將
帥謂皇上樂新復之土成棟亦有邀駕之嫌號令既遠人
心渙散請上一見東諸侯而爲慰勞指屬責其盡意於東
刻期出師一切決於外不中擾也疏令簡討蔡之後給事
中蒙正發先後迎駕曰前日粵東未復宜駐桂以扼楚今
日江廣反在則宜駐桂以圖出楚事機所在毫釐千里王
意未決吏部侍郎吳貞毓奉使還力言成棟忠誠迎駕初

無虛僞宜幸廣成棟亦疏言天下乃太祖之天下今日光復舊業何爲樂新土陛下中興須親統六師行間指揮俾諸將奮勇戮力四方咸知有君自當響應豈可偏安粵西優游歲月令天下豪傑寒心乎此臣鯁鯁至計非冀邀駕之功也王乃由梧入肇慶式耜促刑部侍郎劉遠生入朝阻之而成棟亦自嶺還師議改兩廣軍門爲行宮迺乘輿遠生奉命勞師因謂成棟曰天子者天下主也脫上駕此爵賞征伐人疑天子有私隱令寄政不可不嫌也指揮進取奚能如意成棟然之遂罷修廣州行宮仍以肇慶爲發祥正位之初都焉

八月癸巳朔明桂王還居肇慶進李成棟胡明大將軍以其

養子元肩爲錦衣衛指揮使召大學士瞿式耜於桂林辭不至

成棟備法駕自梧州至肇慶結綵數百里旌旗蔽空樓船相屬連日天氣和朗王駐雞籠山有景雲覆其上黃龍見於海口呂宋遣使入貢甌邏巴國人進圖識王大喜是日辰刻成棟率文武百官郊迎手扶鑾輿入行宮王賜之袍帶尙方劍撫其背曰朕中興全賴卿力成棟疏言式耜擁戴元臣應召還綸扉式耜疏辭乞骸骨不許乃留守桂林徐鼎曰成棟歸明何所成就而有景雲龍見之異乎時又有土人獻白玉一隻云漁人得之南海王命製文曰皇帝受命之寶附志之以知史家符瑞之書類如此夫

明以曹燁爲兵部尙書耿獻忠爲工部尙書袁彭年爲都察院左都御史

時朝臣畧備吏部侍郎洪天擢大理寺正卿潘曾緯廣東提學道李綺通政使毛毓祥皆從成棟反正自廣州來者吏部尙書晏清侍郎吳貞毓給事中吳其濡洪士彭雷得復尹三聘許兆進張起皆與嚴起恆王化澄朱天麟三閤臣自南甯隨扈來者翰林學士陳世傑太僕卿楊邦翰光祿卿王應華給事中李貞御史高資明驗封司吳以連職方司唐元楫皆廣東在籍進士出仕者禮部侍郎吳璟副都御史劉湘客光祿卿陸世廉太僕卿馬光給事中丁時魁金堡蒙正發李用楫文選司施召徵儀制司徐世儀皆

自桂林各路赴行在者然政無大小決於成棟父子諸臣充位而已

甲辰明桂王命李成棟攻贛州

成棟爲人樸訥剛忍嘗言於王曰南雄以下事諸臣任之庾闕以外事臣獨任之王命築壇城東效漢高祖拜淮陰侯故事成棟曰事在人爲耳豈必壇之登與否乎率衆二十萬上南雄然專恣好殺降將田起鳳統兵五千人駐郴州成棟取道樂昌宜章往招之起鳳以衆來歸往來騷擾鄉民有結寨自保者成棟戲謂起鳳試攻之幾於破成棟怒而屠之廣州人衛姓者釀酒謂其鄰黨曰兵至協力禦之一無賴子嫌酒薄告成棟謂合謀殲公衆問以何爲驗

曰凡內裾綴短幅數寸者其黨用以自別也成棟怒欲屠城百官跪請始命邏卒四出掩得卽戮之保昌知縣潘名世亦從成棟反正者也圍人以求索不獲蜚語曰知縣誚公不能殺賊但能殺百姓也成棟竟縛名世斬之

盜殺明兵部右侍郎劉季鏞

季鏞吉水人同升子也從父起義閩中授翰林待詔闖亡入廣西歷官兵部右侍郎是年五月統衆至歸縣逐我大清所置官而居之已而衆散有羣盜來就撫統之王樂昌四出剽掠季鏞禁之不止反爲所殺又有車任重者亦以羣盜就撫爲

大清潮州鎮將李成棟叛後廣東全省歸明道臣李光坦知府

凌犀渠海陽知縣岳桂皆改調他任桂以事笞任重部卒
愬之府府責之愬之道道責之任重怒令衆兵說稱山寇
至突入三人署擒殺之

臣竊曰車任重事何以不書是皆身事兩朝反覆小人死
無足惜者也故畧之

明前大學士路振飛航海朝於肇慶

攷曰本東
明開見錄

明督師呂大器討朱容藩誅之

夔州臨江有天子城容藩改爲天子城以爲己讖部衆數
千居之封石砮酉陽土官爲伯掛將軍印廝養蠻獠授監
軍總兵之職諸將士爲所惑競往歸焉川撫錢邦芭疏劾
之傳檄各大鎮勿爲叛臣所惑封稿達之堵胤錫期合兵

共討屑錫率馬進忠由施州衛乘舟入蜀見容藩正色責之容藩曰聖駕播遷川中不知順逆聊假名號彈壓之耳屑錫呵之曰公身自爲逆何能服叛逆乎公再不悛錢公率兵下吾截其後川將皆朝廷臣子誰爲公作賊者又切責諸附逆者川東文武始知容藩名號之僞多解散者督師呂大器至涪州李占春來謁適容藩有牌至書楚王世子監國天下兵馬副元帥衙大器笑曰副元帥非親王太子不敢稱天子在上何國可監此人反叛明矣爾等受其官必不免占春請討叛以贖罪整師至天子城容藩敗走夔州山中土人擒獻斬之川東悉平

戊申我

大清兵克同安明朱成功部將邱繒林壯猷金作裕知縣葉翼雲教諭陳鼎皆死之

我大帥佟鼎李率秦陳錦合師逼同安繒壯猷守大盈嶺以扼泉師作裕守苾溪嶺以扼漳師翼雲督民兵守城我領旗黃有信率驍騎冲突繒中流矢壯猷不支遁入城作裕聞之亦斂軍回分門死守

王師曉夜攻擊城遂破繒壯猷作裕皆巷戰死翼雲曰今日猶得死於明土亦吾輩之幸也與鼎皆不屈死

王師以城內堅拒不下屠之初同安有陳世冑者號鱗仙善術數聞仙遊王志章能刺陰陽事往候之志章預置片紙於硯匣屬童子曰世冑來令自取視世冑讀之有鱗魚死半

途同安血流溝嘉禾斷人種安溪成平浦之語悚然奔見
成功以志章言告成功妄之既而世胄歸途暴亡同安之
屠血流溝渠始信之後踞廈門斷俘者掌欲以壓嘉禾斷
人種之譏嘉禾廈門舊號也康熙癸卯李率泰請棄諸島
移民遷界嘉禾果斷人種安平在界外亦遂成平浦焉
臣竊曰書曰明朱成功部將何以別於魯也

明朱成功遣前中書舍人江干燦黃志高奉表於肇慶

唐王聿粵之敗也林察不敢歸肇慶航海依成功始知永
歷帝立加額曰吾有君矣遣于燦等航海至行在

明朱成功遣其將甘輝擊林日灼克之

成功率銅山修船練兵聞同安告急整師往救抵金門而

同安已破我漳浦守將王起偉謀降事洩棄家從舊鎮奔
銅山成功以爲總練使同柯宸樞聯絡銅山等處募兵捐
餉詔安縣人林日灼鼓衆拒之成功令輝擊之日灼旋滅
九月癸亥有火星自東隕有聲

壬午明何騰蛟復永州遂復衡州

騰蛟統曹志建等圍永州三月大小三十六戰城中食盡
咽糠齧草初食馬繼食人老弱婦女俱盡城破之日洒掃
官署所剔婦人陰棄不食者十五石

王師殺鄉官劉興秀突圍走衡州旋引遁騰蛟將遣兵長沙而

志建不待令還屯永州之龍虎關騰蛟因頓兵不進

按明

史何騰蛟傳以克永州爲十一月朔日事行在陽秋東明
聞見錄均以爲九月事茲以時事前後次之知當日以聞

報不一致
舛誤也

明前洧川知縣王燭起兵復廬州

燭字定安羅田舉人投洧川知縣是年秋與曹鼎昌起兵破廬州不守轉戰斬黃問又與霍山侯應龍張岡谷楊國士合兵攻霍山不下

冬十月明監軍御史余鯤起職方主事李甲春復寶慶

明馬進忠復常德

明瞿式耜疏請回蹕桂林

時永州寶慶兩府捷音同日並奏軍聲大振尋督師報恢復衡州李赤心報已取益陽於是式耜疏曰天下大勢在楚不在粵粵東三面險阻易入難出臣不敢爭者以成棟

一片血忱方倚爲江右聲援阻其望幸之心何以勸忠今
衡永恢復粵西之背愈厚而江圍未解粵東之齒尙寒在
成棟宜奉皇上去危就安旣無內顧之憂可畢力以圖殲
而楚師得萬乘親臨亦勇氣十倍矣

助堵胤錫招李赤心於夔州馬進忠遂掠常德走武岡李赤
心引兵東走湖南州縣復歸於我

大清

馬進忠者流寇所號混十萬也旣降封武昌伯嘗敗

王師於麻河斬七千餘級封鄂國公堵胤錫與之有隙招李赤
心自夔州至欲令進忠以常德讓之未至百餘里胤錫與
進忠推牛歃血盟誓共獎王室進忠固知其謀終盟無一

語入城卽命起營驅百姓出城縱火不遺一椽走武岡王
進才聞之亦棄寶慶走各營鎮帥聞風驚潰旣赤心至得
空城亦棄之引兵而東趨長沙所至守將皆燒營走湖南
新復州縣爲之一空全楚大局自此不可爲矣

臣竊曰大書之罪屑錫之以私忿亂大謀也屑錫之哱高
李讓者嘗之竊獨以爲不然是時鐘簾銷沈湖山碎裂以
殘喘之延能制高李強寇之死命乎不能制之而猶欲仇
之是速之吞噬也畜鴟梟於藩籬搜豺狼於左右其忍垢
含尤之用不可謂非權宜達變之才矣獨其逞私忿於進
忠委全楚於敵國失弋仲之歡終悔襄國激鄆境之叛逆
失淮西則必自伐而後人伐之此之謂也金堡之責屑錫

曰勞則有之功於何有嘻豈獨無功哉

丁巳李成棟之兵潰於贛州城下

我守將高進庫故隸左良玉麾下與成棟有舊僞輸款以
縋其師約以踰秋救不至卽降成棟爲所給厲氣攻之盡
移軍中火具以行苛執夫役士人亦不免焉是日薄暮抵
贛州將士饑疲而成棟氣驕莫敢言五更城上呼董大哥
者三成棟夢中驚醒曰董大成是我中軍豈我軍已爲彼
有邪俄而城中鼓角齊鳴開門突出成棟策馬先奔軍士
爭竄自庾闕至梅嶺軍資器械靡有存者

明洪雅兵亂

洪雅鎮將湯國聘與團練花漢將熊振生治兵相攻洪雅

之境無甯宇

明封朱成功爲威遠侯

攷曰黃宗羲賜姓始末云封成功延平王誤也成功之封王在戊戌正月

宗義紀魯事皆得之目睹其於成功則本之傳聞不皆可據

明魯大學士馬思理卒以沈宸荃劉沂春爲東閣大學士

明朱成功復雲霄

降將張國柱敗沒成功遂率衆攻城我中軍守備姚國泰巷戰重傷被擒成功惜其勇令醫治用爲監督

十一月明誅佟養甲

養甲於崇禎年間詭名董茨由提塘驟遷至總兵宏光時以賄馬士英提督南直鹽法

下師南下隨貝勒博洛入關關部陳子壯之死也養甲投其骨

於四郊既歸明朝臣輒以此相挫辱義甲悔之密令人齎表北行爲李元胤邏者所得遣祭興陵密敕工部主事陳純來殺之並同降之巡按御史劉顯名攷曰西粵新書以爲十月初九日事而明史稿桂王紀畧載諸十一月按東明聞見錄謂成棟敗歸慮他變則是十一月也明以李元胤署吏部尙書

元胤本姓賈河南人成棟養爲己子與袁彭年善彭年益引其同鄉丁時魁蒙正發及劉湘客與同決事會給事中金堡自湖南服闋赴行在湘客令元胤折節與交因有黨人之目會元胤既殺佟養甲威權愈赫其誕日饋送稱觴自八月達於冬杪通政司疏陳乞官日以手計閣臣票擬惟著議具奏四字非奉成棟劄咨不得除授文選司擁空

名而已給事中吳其濡有清文武之職掌以肅朝綱一疏
元脩銜之次骨其濡宵遁疏亦留中

明堵胤錫復益陽湘潭湘鄉衡山等縣進圍長沙不克
胤錫率李赤心等收降將線國安於湘潭遂復益陽湘潭
湘鄉衡山等縣而赤心桀驁多屠掠長沙聞之協力拒守
故弗克

明揭重熙傅鼎銓合兵援南昌與我

大清兵戰於三江口敗績

聞之亡也重熙鼎銓俱解兵入武夷山金聲桓以江西歸
明遣迎兩人而兩人殊不欲駐省請任閩事時邵武方宿
寇兵重熙進薄城下爲守兵所敗喪失幾盡聞南昌圍急

乃入粵求援鼎銓兼督兩軍與張自盛合營援南昌戰於三江口復敗自盛本金王部將也

明都昌在籍前督師余應桂起兵援南昌與我

天清兵戰於落星湖敗績

應桂字二磯都昌人萬厯己未進士崇禎時兵部右侍郎十六年十月督師孫傳庭戰歿命應桂代之無兵無餉遂巡不得前奪職以新擢陝西巡撫李化熙代之北都亡應桂家居每語人曰吾年六十四官尊祿厚復何恨所未了者欠先帝一死耳是時起兵都昌率舟師援南昌進至落星湖敗績

明前工部右侍郎劉士楨遣兵援南昌敗績死之

士楨自贛州破後匿南田不出逮金王事起遺囑子肇履募兵從圍贛州而令季子穉升趨南雄事敗匿龍泉我郡守索之急乃絕粒死穉升戰死長橋鋪

徐勣曰江西義師之役自揭重熙傅鼎銓陳泰來曾亨應而下皆彰彰在人耳目獨劉士楨事世鮮知之蓋亂後湮沒者多矣士楨在南都嚴朝參之禁劾統領之妄風節矯矯豈獨死事可嘉哉書之以告修史者

明建昌人孔徹元孔徹哲蔡觀光起兵援南昌尋敗死

徹元徹哲家素封與觀光起兵應金聲桓徹哲以援南昌戰歿徹元不能忘也明年七月有訛傳瑞德七邑奉宗室某起事者徹元喜遽入城戕邑令已而各邑寂然被執死

觀光尋揭竿南昌走鄱陽爲邏卒所獲亦死

攷日以上援兵月日不可

攷姑以事類敘之

明九江生員金志達僧了悟起兵復東流建德尋敗死

志達與了悟集衆萬餘結營鄱陽彭澤間出戰池州取東流建德尋敗死

明前右僉都御史甯夏巡撫李虞夔起兵平陸克潼關連復蒲州解州

虞夔字一甫平陸人天啓壬戌進士累官右僉都御史巡撫甯夏時降將姜瓖以大同叛其黨姚舉等劫殺官軍並運餉冀甯道王昌齡於平原驛瓖自稱大將軍易明冠服諸在籍鄉官如萬練劉遷王永強輩皆舉兵應瓖練踞偏

關復甯武岢嵐保德遷畧雁門關及代州繁峙五臺等縣
永強據榆林窺西安虞襲乘勢起兵克潼關及蒲解二州
臣竊曰是時我

朝甫定天下人心未一故明忠義之士心乎故國者懷子房報
韓之心矢君堯拒唐之節周之頑民殷之義士也紀年皆
錄而予之而一時凶狂悖逆之徒亦詭其名以託焉何以
或書或不書紀年一書記明事也金聲桓李成棟之事有
關於明之成敗也則因事書之其姜瓖李建泰吳三桂耿
精忠之流自爲叛逆與明無與則畧之非有他義也萬練
劉遷玉永強皆明官也始末不可詳故因書虞襲事而增
著之焉

十二月辛卯朔我

大清兵援長沙明李赤心大掠湘潭而遁

明誅降臣李紹祖

紹祖瞿式耜同年進士也爲我

大清湖南巡撫守永州糧盡援絕降於何騰蛟解至桂林式耜
流涕讓之曰汝素受國恩奈何生爲背叛之人死作不義
之鬼紹祖曰天下人皆降豈獨紹祖也式耜曰天下人皆
不爲紹祖敵其奈我何紹祖詞窮遂磔之

明召弋陽王

攷曰按世表弋陽王多燧於萬曆
年薨無子國除茲蓋其支庶也

於建陽山中

不至

建陽者從英德之滄光屢遡流而上爲陽山縣爲連州爲

連山縣達於湖廣地皆深林峭壁人善用礮以背負之發輒命中弋陽王某甯藩宗室也避亂山中土人擁戴之李成棟屢攻不能克反正後遣科臣洪士騰往亦不得入宣忠伯王承恩請行命齎敕往遇王於陽山其衆皆居奇自恣不聽王赴闕有標下彭鳴京鍾某羅某願統衆隨承恩自効亦不果

小腆紀年附攷卷第十五

鍾南宋左大光伯
秦順林太冲
福州謝定甫宗善
司里受業汪建利
參校